

# ŠULSKE NOWINY



Serbska wyša šula Ralbicy  
UNESCO projektna šula  
[www.sorbische-schule-ralbitz.de](http://www.sorbische-schule-ralbitz.de)

Wulki rózka a mały rózka 2025  
30. lětnik, 290. wudaće

## Politika pola nas: Interview z wjesnjanošću

Dnja 7. nowembra 2024 pře-  
wjedźechu šulerjo a šulerki  
8. lětnika Serbskeje wyšeje šule w  
Ralbicach w ramiku towaršnowědy  
rozmołwu z wjesnjanošću knjezom  
Ryćerjom. Po witanju slědowaše  
krótki teoretiski dźěl, w kotrymž  
knjez Ryćer sebje a swójske  
powołanske wuwice předstaji,



natwar a nadawki gmejny rozkładže a dohlad do swojeho dźěla jako wjesnjanoša  
da. Nětko sćěhowachu mnoho prašenjow ze stron šulerstwa. Mjez druhim běchu  
šulerjo a šulerki zajimowani, hdže ma so w přichodže lutować, kotre konsekwency  
ma nadměrne wudaće pjenjez w gmejnje a kak daleko je twar noweje pěstowarnje.  
Nimo toho běchu dalše prašenja: Hdy ponowi so puć do Jitka? Kak dźělatej gmejna  
a koparske towarstwo hromadže? Kak začuwa wjesnjanoša njespokojnosť  
wobydlerjow w gmejnje a kak z tym wobchadza? Tute a dalše prašenja, kotrež  
běchu so hižo we wučbje přihotowali, wotmołwi Hubertus Ryćer wěcownje a z  
mnoho přikładami. Čas rozmołwy miny so spěšnje, tak zo zwosta snano te abo tamne  
prašenje njewotmołwjene. Při tym maja so wosebje šulerjo a šulerki 8. lětnika za  
prócu a přihot prašenjow chwalić. Wjeselimy so, zo je sej wjesnjanoša knjez  
Ryćer čas wzał, wuknjacym prašenja wotmołwić a chcemy so na tutym měštnje  
wutrobnje dźakować. Wučbny plan 8. lětnika ma komunalnu politiku a z tym

zwisowace problemowe rozestajenje kruće zaměstnjene. Džakowano wosobinskeje rozmołwy zhonja šulerjo a šulerki wjac wo aktualnej politice w swójskim wobswěće a móža so intensiwnišo z tym rozestajić. To je wažne k wutworjenju politiskeje zrałosće, kotraž je wobstatk fungowaceje demokratije.

- tekst a wobraz: Mathias Kliemank -

### Wolejbulowy turněr znowa uspěšny

Druheho hodownika 2024 wotmě so kóždolětny adwentny wolejbulowy turněr w Ralbicach, na kotrymž so šulerjo wosmeho do džesateho lětnika, něhdyše džesatki, wučerjo a Sokolski team wobdžělichu. Po scóplenju hrajerjow a narěči sportowych wučerjow započinachu so napjate hry. W běhu wječora zastara nas džesaty lětnik z jědžu a pićom w jědźerni. Nic jenož woni, ale tež zwonkastejacy kaž starši abo přećeljo su přišli, zo móhli mustwam při hraću přihladować a jich podpěrać. Turněr njebě jenož napjaty, ale tež chětro wučerpacy. Dokelž pak při hraću wjele wjesela mějachmy, smy so cyły wječor z połnym elanom na turněrje wobdžělili. Něhdže štyri hodžiny hrajachmy bule přez wolejbulowe saki, doniž njemóžeše knjez Bejmak zasluženyh dobyćerjow turněra wozjewić. Něhdyše džesatki dobychu lětsa třeće lěto za sobu adwentny wolejbulowy turněr tu w Ralbicach. Na druhim městnje běše team Sokół a třeće městno wudobychu sej naši wučerjo a naše wučerki. Turněr, na kotrymž so džesać mustwow wobdžěli, bu wot džesateho lětnika, knjeza Bejmaka, knjeza Zahrodnika a knjeni Manjapparra organizowany. Džakujemy so jim wutrobnje a skónčimy z mócnym: Sportej zdar!


- tekst: Jakub Barč -

### Dohodowne zynki w cyrkwi

Pjatk, dnja 20.12.2024, podachu so w 11.00 hodžin wšitcy šulerjo a

wučerjo wyšeje šule do Ralbičan cyrkwe k

adwentnemu spěwanju. Kóžda rjadownja bě sebi serbski adwentny spěw wupytala a přenju štučku spěwała. Dokelž ležachu na kóždej ławce teksty spěwow, móžachmy dalše štučki zhromadnje spěwać. Tak zaklinčachu spěwy kaž



„Swěčka swěć nam w čěmnej nocy“, „Śćicha swjata Borbora“, „Adwentna hwězda jasnosće“, „Njebjo, zemja, raduj so!“ a dalše spěwy přez wšu Ralbičan cyrkej. Na kóncu pak mějachmy wjeršk našeho lětušeho adwentneho spěwanja. Wšitcy zhromadnje spěwachmy rjadownja po rjadowni hodowny spěw „Gloria in excelsis deo“. To klinčeše wulkotnje po našej swjatnicy. Wosebity džak słuša 10. lětnikej z wučerjomaj, kotřiž su spěwy připowědzili, so jako swjaty Mikławš a swjata Borbora zdrasćili a cyłkownje tute adwentne spěwanje organizowali. Bě to rjany wjeršk tutoho poslednjeho šulskeho dnja w lěće 2024.

- tekst: Jakub Barč -

## Dzeń Walentina

Dzeń Walentina je poprawom kóždemu znaty. Ale sće poprawom wědzeli, čehodla je runje 14. februar dzeń lubowacych? W 3. lěstotku je Walentin lubowacych w

Romje tajnje křescansce zwěrowať.

To pak bě kruće zakazane, dokelž su so w tutym času křescenjo wěry dla přescěhowali (verfolgt). Dla swojich

skutkow wotruba so jemu 14. februara 269 hłowa. W lěće 469 zawjedže bamž Gelasius I. dzeń swjateho Walentina. Hdyž tutón dzeń z wašim lubuškom swjećiće, potom darujće sej černiki, šokolodu a dariki jako symbol lubosće. Njezabudźće pak tež na lube zbožopřeća.

žórto: <https://de.wikipedia.org/wiki/Valentinstag>

- tekst: Liska Markulec -

### INFORMACIJE – TERMINY – WŠELČIZNY

**14. małeho rózka**

**wot 17. do 28. małeho rózka**

**wot 3. do 7. nalětnika**

wudaće połětnych informacijow

zymske prózdniny

přizjewjenje do 5. lětnika

zbytne wobrazy: [www.pixabay.de](http://www.pixabay.de)